



Bentiaraq Ottosen

UKA 2026/242-1

Atassut

24. September 2026

Inissianik attartortitsisarneq pillugu Inatsisartut inatsisissaattut siunnersuut

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq)
(Siullermeernera)

Atassutip tunngaviusumik isiginnittariaasia naapertorlugu inissianik attartorneq pillugu Inatsisartut inatsisaat nutarterneqarnissaa tunngaviatigut tapersorsorneqarsinnaavoq, pingaartumik inatsisit paasiuminarnerulernissaat, erseqqissuunissaat aammalu Kalaallit Nunaanni inissianik attartornermut tunngasunik inatsisit ullutsinnut naleqqussarnissaat eqqarsaatigalugu.

Atassut isumaqarpoq inuiaqatigiit namminneq akisussaaffimmik tigusinerat pingaartuulluinnartoq, taamaattumik Atassummiit siunertariuarparput inuit amerlanerpaartaat namminneq pigisaminnik initaartalernissaat. Tamanna pingaartuuvoq akileraartarnikkut aaqqissuusinnikkut inuit akissaataasa pitsaanerulernerannik kinguneqartumik inuit akisussaassuseqarlutik namminneq initaarnissaminnut akissaqarnerulernissaat pingaarnerutillugu iliuuseqartuarnissaa.

Siunnersuummi 2005-imiilli allannguutit assigiinngitsut ataatsimut katersorneqarnissaat pitsaasutut isigineqarsinnaavoq. Inatsit attartortunut attartortitsisunullu paasiuminartuunissaa qulakkeersinnaaqqullugu., pingaartuuvoq aamma qiviassallugu pisortanut aqutsinermi oqartussaasunullu suleriaaseq pitsaasumik erseqqissarneqarnissaa.

Atassutip isiginnittaasia naapertorlugu attartortoq attartukkaminut akisussaaffeqarpoq. Kisiannili nunatsinni pisortat inissiarpassuisa qanoq annertutigisumik aserfallassimanerisa takutippaat ineqarnikkut ineriartornerup qanoq peqqinnangissinnaatiginera. Pisortat aammalu inatsisiliortut pisussaaffeqarput inuiaqatigiit qanimut suleqatigalugit oqaloqatigiinnissaa, ilaatigut maluginiarneqarsinnaasarpoq oqariartuutiguaratsigu inuit amerlanerpaartaat namminneq pigisaminnik initaartalernissaat siunertariuaratsigu. Namminneq pigisaaq nalilik taanaavoq ineriartornissamut annerusumut ikaarsaarnissamut pigisaqartitsilersartoq.

Atassummiit qiviarluarusutatta annersaat tassaavoq pilersaarutaasumik piffissaliilluni aserfallatsaaliinerup pitsanngorsartuarnissaa, ukiorpassuimmi pisortat inissiaataat aserfallassimaqisut maannakkut isiginnaaginnarpagut. Qiviarutsigimi taamanikkut oqariartuutigisimavarput ullumikkut ineqarneq pillugu oqartussaaffimmik tigusilerpugut, ataasinguamilluuniit aserfallatsaalineqarnissaannut aningaasaliissuteqarata. Tamanna isumaqarpugut Atassummiit isumaqatigiissutigisinnaasallutigu ullumikkut ineqarnikkut attartornermi aserfallatsaaliinerup akiorneqarnissaannut suleqatigiilluta aaqqiissuteqarta –



Atassummiimmi piareersimavugut aserfallatsaaliinermut kinguussaaqaffipput
aaqqissuuteqarfiginissaat anguniarnissaanut.

Atassut pingaartilluinnarpaa nunatsinni ineriartornissamut periarfissat atorluarneqartariaqarnerat, assersuutigiinnartigu maannakkut periarfissat illoqarfinni allani periarfissaangitsut qiviariartigit. Kujataani Qaqortumi illorsuit marluk portusuut pisortat inissiaat attartortittagaat ingitserneqarlutik isaterneqarnikuupput, nunatta sineriaanni aamma pisortat inissiaat attartortittakkat oqummik eqqugaallutik inuerutsitaanikuupput. Tamakkua assersuutitut qiviassagaanni isumaqarpugut ersarissarneqartariaqartoq pilersaarutaasumik piffissaliilluni aserfallatsaaliinerup pitsanngorsarnissaanut periarfissat ammaanqartut atorluarneqarnissaat.

Atasummiit tamakkuupput qiviarusutagut pitsanngorsarusutagut aammalu pingaarnertut isiginiarparput pisortani ineqarnikkut attartortitsisarnerup patajaatsumik eqaattumillu suleriuseqarnikkut pitsanngorsagassaasoq, tamanna qulakkeerumallugu attartortumut illersuuteqarnissaq, piginnittuunermut inatsit aamma pitsaasumik qulakkeerneqarnissaa, isumaqatigiissutinullu ataqpeqatigiinissaq anguneqarsinnaasoq.

Qulakkiigassaqarpugut ajornartorsiutit aamma pitsaanerusumik appakaanissaat anguniarlugu, assersuutitut oqaatigisinnaavarput inuit timimikkut innarluutilinnut aammalu ersinngitsumik innarluuteqalersimasunut ineqarnermut attartornissaq pitsaaneruleqqullugu. Tamannami aamma qulakkeerneqarsinnaammat naalagaaffiit peqatigiit isumaqatigiissutaat peqatigalugu tulluusartoqarsinnaanera.

Atassummiit qulakkeerusulluinnarparput pisortat inissiaannik attartortittakkani aserfallatsaaliinerup pitsaasup tungaanut aallarnissaa, aammalu qilanaarilluinnarparput oqariartuutigineqartut qaqinneqartullu pillugit oqallinnissamut. Tassami ersarissumik Atassutip ineqarneq pillugu politikimini pingaartilluinnarpaa aserfallatsaaliinerup qaffasissumik inissinneqarnissaa, aningaasarsiornerimmi inuiaqatigiinnut suliffeqarfinnut namminersortunut iluaqutaalluinnassammata aammalu ineriartornermik kinguneqarluni inuiaqatigiit namminneq pigisaminnik ineqalernissaat anguneqarsinnaanissaa qulakkeerneqassammat.

Inissiat aserfallassimasut tusaqqusaarutigalugit oqaluttuaanarnianngilagut, kisiannili tunngaviusumik oqariartuutigerusupparput tamattaalluta aaqqiissuteqarnissatsinnut suleqatigiissuteqarnissatsinnut. Taamaattumik ilaqutariinikkut politikitta ersersittarpaa ilaqutariineq nunatsinni politikki pingaarnersaasoq, angerlarsimaffik toqqissisimasooq aammalu peqqinnartumik ineqarnikkut attartortup najugaqaanarnissaanut periarfissat pitsaanerulersinnissaat. Tamanna tunngavigalugu politikikkut oqilisaasoqarnissaa ineqarnikkut pingaarutilerujussuurtut isigineqarsinnaavoq.

Taamatut oqaaseqarluta Naalakkersuisut kaamattorpagut oqariartuutigisagut pingaarutillit ersersinneqarnissaat.



Siunnersuut taperserparput Sanaartornermut ataatsimiititaliamut innersuullugu inassutigaput.